



Datë: 17.04.2026

A.nr.401/2026

Këshilli i Pavarur Mbikëqyrës për Shërbimin Civil të Kosovës–Kolegji për Shqyrtimin dhe Vendosjen e Ankesave në përbërje nga: Arben Mehmeti, kryetar, Ardita Haxhnikaj-Demi, dhe Malsore Gashi-Bajraktari dhe Eshref Shabani, anëtarë, me Avdyl Bekteshi, në cilësinë e procesmbajtësit, në procedurë sipas ankesës me numër A.nr.401/2026, të datës 03.04.2026, të parashtruar nga ankuesit A.I, A.S M, D. K M, D. B, A. B, D. J, H. T, L. N, P. D, S. A, S. G, Z. R, A. M, D. Sh, D. M, F. R, N. A, S. Sh dhe T. H, të cilët me autorizim i përfaqëson Avokate A. F. B. nga Prishtina, kundër organit të punësimit Komunës së Klinës, në çështjen juridike “*kompensim material*”, duke vepruar në pajtim me nenin 6, paragrafin 1 nën, paragrafin 1.1, nenin 16, paragrafin 3 dhe nenin 18, paragrafin 1, nën paragrafin 1.8 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, më datë 17.04.2026, mori këtë:

V E N D I M

I.Këshilli i Pavarur Mbikëqyrës për Shërbimin Civil të Kosovës, *shpallet jo kompetent* për të vendosur lidhur me ankesën A.nr.401/2026, të datës 03.04.2026, të parashtruar nga ankuesit A.I, A.S M, D. K M, D. B, A. B, D. J, H. T, L. N, P. D, S. A, S. G, Z. R, A. M, D. Sh, D. M, F. R, N. A, S. Sh dhe T. H.

II.Lënda delegohet për shqyrtim tek Komisioni i Ankesave në Komunën e Klinës.

A r s y e t i m

Ankuesit A.I, A.S M, D. K M, D. B, A. B, D. J, H. T, L. N, P. D, S. A, S. G, Z. R, A. M, D. Sh, D. M, F. R, N. A, S. Sh dhe T. H (*me tej referuar vetëm ankuesit*), përmes përfaqësuesit të tyre me datë 03.04.2026, kane parashtruar ankesë në Këshillin e Pavarur Mbikëqyrës për Shërbimin Civil të Kosovës, kundër mos kompensimit të shujtës ditore sipas Vendimit 01Nr.06-31721/2022 të datës 30.10.2020 të Kuvendit Komunë të Klinës në vlerën prej 2.50 Euro nga data 01.10.2020 dhe Vendimit 01Nr.6-3885/2025 të datës 05.02.2025 të Kuvendit Komunë të Klinës për ndryshimin e kompensimit të shujtës në vlerën 4 Euro nga janari 2024.

Kolegji për Shqyrtimin dhe Vendosjen e Ankesave pas shqyrtimit të shkresave të lëndës konstaton se Këshilli i Pavarur Mbikëqyrës për Shërbimin Civil i Kosovës nuk është kompetent për të vendosur për ankesën e parashtruar nga ankuesit, **sepse:**

Nga provat e lëndës rrjedhë se ankuesja A.I sipas Ndryshimit dhe plotësimit të Kontratës së Punës 01 Nr.112-9384/20 të datës 14.04.2020 është e punësuar në pozitën *Përgjegjëse e Resurseve Humane*, ankuesja A.S-M sipas Kontratës së punës 01Nr.112-17934/21 të datës 25.05.2021 mban pozitën *Përgjegjëse/Zyrtare Financiare*, ankuesja D.K-M sipas Kontratës së punës për kohë të pacaktuar 01Nr.112-40030/23 të datës 15.11.2023 mban pozitën Zyrtar për Arkiv, ankuesi D.B sipas Ndryshimit dhe Plotësimit të Kontratës së

Punës 01Nr.112-7731/20 të datës 02.03.2020 mban pozitën *Zyrtar Ligjor*, ankuesi A.B sipas Kontratës së Punës për Kohë të caktuar 02Nr.112-5554/14 të datës 17.12.2014 mban pozitën *Operator në SISH*, ankuesi D.J sipas Ndryshimit dhe Plotësimit të Kontratës së Punës 01Nr.112-9383/20 të datës 14.04.2020 mban pozitën *Menaxher i IT*, ankuesi L.N sipas Kontratës së Punës për Kohë të Caktuar 02Nr.112-12692/19 të datës 29.03.2019 mban pozitën *Mirëmbajtës*, ankuesi P.D sipas Kontratës së Punës për Kohë të Caktuar 02 Nr.112-5403/15 të datës 08.10.2015 mban pozitiven *Kontabilist*, ankuesi S.A sipas Kontratës së Punës për Kohë të caktuar 02Nr.112-6082/15 të datës 22.12.2015 mban pozitën *Operator në SISH*, ankuesi S.G sipas Kontratës së punës për kohë të caktuar 02Nr.112-5572/14 të datës 17.12.2014 mban pozitën *Operator në SISH*, ankuesja Z.R sipas Kontratës së Punës për Kohë të Caktuar 02 Nr.112-5574/14 të datës 17.12.20214 mban pozitën *Operatore në SISH*, ankuesi A.M sipas Kontratës së Punës për Kohë të caktuar 02Nr.112-5474/14 të datës 16.12.2014 mban pozitën *Shofer*, ankuesi D.Sh sipas Kontratës së Punës për Kohë të caktuar 02 Nr.112-332/12 të datës 19.01.2012 mban pozitën *Shofer*, ankuesi D.M sipas Kontratës së Punës për Kohë të caktuar 02 Nr.112-5426/14 të datës 15.12.2014 mban pozitën *Shofer*, ankuesi F.r sipas Kontratës së Punës për Kohë të caktuar 02Nr.112-5478/14 të datës 16.12.2014 mban pozitën *Shofer*, ankuesi N.A sipas Kontratës së Punës për Kohë të caktuar me Nr. 02-1123105/15 të datës 30.04.2015 mban pozitën *Shofer*, ankuesi S.Sh, sipas Kontratës së Punës për Kohë të Caktuar 02Nr.11201970/17 të datës 28.03.2017 mban pozitën *Shofer*, ankuesi T.H sipas Kontratës së Punës për Kohë të Caktuar 02 Nr.1120330/12 të datës 19.01.2012 mban pozitën *Shofer*, të gjithë në Qendrën Kryesore të Mjekësisë Familjare “Nëna Terezë” në Komunën e Klinës.

Kuvendi Komunal i Klinës në mbledhjen e datës 30.10.2020 ka nxjerr Vendim 01Nr.06-31721/20 për pagesën e shujtës për të gjithë të punësuarit në Administratën e Komunës së Klinës në vlerën prej 2.50 euro dhe atë duke filluar nga data 01.01.2020, ndërsa në mbledhjen e mbajtur më datës 31.01.2025, ka nxjerr Vendim 01 Nr. Prot.063885/2025 për miratimin e kërkesës së Drejtorisë për Financa, Ekonomi dhe Zhvillim për ndryshim-plotësimin e vendimit 01Nr.06-31721/20, ku shujta ishte paraparë prej 2.50 euro ndërsa ngritët në 4 euro duke filluar nga muaji janar 2024.

Ankuesit në ankesën e parashtruar në Këshillin e Pavarur Mbikëqyrës për Shërbimin Civil të Kosovës, pretendojnë se edhe përkundër se vendimet janë marr nga Kuvendi Komunal i Klinës lidhur me pagesën e shujtës, të njëjtat nuk janë zbatuar. Kërkojnë që të obligohet Komuna e Klinës për filloj zbatimin e vendimeve dhe të bëjë kompensimin retroaktiv të të gjitha shumave të papaguara për shujta ditore duke përfshirë në mënyrë të veçantë edhe periudhat për të cilat nuk është bërë pagesa (2023 dhe 2025) si dhe çdo periudhë tjetër deri në zbatimin e plotë.

Në kuptim të përcaktimit të kompetencës materiale të Këshillit për vendosje lidhur me çështjen në procedurë ankimore, Kolegji i Këshillit i'u referua dispozitave të nenit 5 të Ligjit Nr.08/L-197 për Zyrtarët Publik, më të cilin përcaktohet se: *Kategoritë e zyrtarëve/publik janë: 1.1. Nëpunësja/i i shërbimit civil; 1.2. Nëpunësja/i i shërbimit publik; 1.3. Krijuesja/i dhe përformuesja/i e/i artit dhe kulturës; 1.4. Nëpunësja/i teknik dhe mbështetës; dhe 1.5. Zyrtarja/i i kabinetit. 2. Nëpunësja/i i shërbimit civil është zyrtarja/i publik në kuadër të shërbimit civil i cili merr pjesë në formulimin dhe/apo zbatimin e politikave, monitorimin e zbatimit të rregullave dhe procedurave administrative dhe ofrimin e mbështetjes së përgjithshme profesionale dhe administrative në zbatim. Nëpunësja/i i shërbimit civil ushtron detyrën në pozitën përkatëse, duke filluar nga zyrtarja/i profesional deri në pozitën e drejtueses/it të lartë, në administratën e Presidentes/it të Republikës së Kosovës, në administratën e Kuvendit të Republikës së Kosovës, në Zyrën e Kryeministres/it të Republikës së Kosovës, në Ministri, në Agjenci Ekzekutive dhe në degë lokale të tyre, institucione të pavarura kushtetuese, në agjenci të pavarura dhe rregullatore, në administratën komunale dhe çdo nëpunës/ës statusi i të cilit është përcaktuar si nëpunës/ës i shërbimit civil, me ligj të veçantë. 3. Nëpunësja/i i shërbimit publik është zyrtarja/i publik i cili ofron shërbime publike të drejtpërdrejta për qytetarët në fushën e arsimit, shëndetësisë, kulturës, artit, në fushën e mjekësisë ligjore, si dhe shërbime tjera të ngjashme publike. Nëpunësja/i i shërbimit publik ushtron detyrën në pozitën përkatëse duke filluar nga niveli profesional deri në nivelin e lartë drejtues. Nëpunësja/i i*

shërbimit publik është edhe nëpunësja/i i shërbimeve të brendshme në administratën e shërbimeve publike pjesë e administratës shtetërore, në administratën e shërbimeve publike apo pjesë e komunës...”, rrjedhimisht në kuptim të këtyre dispozitave ligjore rezulton së të gjithë të punësuarit në kuadër të institucioneve publike shëndetësore të Kosovës që ofrojnë shërbime të drejtpërdrejta, përfshirë zyrtarët e nivelit të lartë drejtues, drejtues, profesional dhe shërbimeve të brendshme kanë statusin e nëpunësit të shërbimit publik, dhe si rrjedhojë e këtij përcaktimi rezulton fakti së pozitat e ankuesve janë pozita me status të nëpunësit të shërbimit publik. Andaj, Kolegji konstaton se Këshilli i Pavarur Mbikëqyrës për Shërbimin Civil të Kosovës, nuk ka kompetenca lëndore për të vendosur lidhur me ankesën e ankuesve, sepse, duke u bazuar në nenin 6, paragrafi 1, nën paragrafin 1.1 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, Këshilli është kompetent për të shqyrtuar vetëm ankesat e nëpunësve civilë dhe kandidatëve për pranim në Shërbimin Civil.

Në kuptim të udhëzimit të palës ankuese lidhur me të drejtën në mjete juridike, kolegji vë theksin te neni 8 i Ligjit Nr. 08/L-294 për Ndryshimin dhe Plotësimin e Ligjit Nr. 08/L-197 për Zyrtarët Publik, ndërlidhur me nenin 27 të Ligjit Nr. 08/L-197 për Zyrtarët Publik ku përcaktohet se :” *Nëpunësi i shërbimit publik dhe nëpunësi teknik dhe mbështetës kanë të drejtë të parashtrojnë ankesë tek Komisioni i Ankesave i themeluar nga punëdhënësi, për çdo veprim apo mosveprim që i cenon të drejtat apo interesat e ligjshme që burojnë nga marrëdhënia e punës. Qeveria pas propozimit të ministrisë përgjegjëse për administratë publike, me akt nënligjor përcakton procedurën dhe rregullat për themelimin, përbërjen dhe mandatin e Komisionit të Ankesave”,* pra, zyrtarët publikë të kategorisë së shërbimet publik dhe të kategorisë administrative mbështetëse, në rast të pretendimeve për shkelje të të drejtave të tyre nga marrëdhënia e punës, fillimisht mund të parashtrojnë ankesë tek punëdhënësi i cili themelon një Komision të Ankesave në pajtim me kërkesat ligjore, e më pastaj, duke ju referuar përcaktimeve ligjore sipas nenit 77 të Ligjit Nr.08/L-197 për Zyrtarët Publik, mund të ushtrojnë padi në gjykatën kompetente duke ndjekur procedurën e paraparë në nenin 78 dhe 79 të Ligjit Nr. 03/L-212 i Punës ku shprehimisht thuhet se: **Neni 79, paragrafi 1** “... **1.** *I punësuar i cili vlerëson se punëdhënësi ka shkelur të drejtën e marrëdhënies së punës, mund të paraqesë kërkesë te punëdhënësi apo organi përkatës i punëdhënësit nëse ekziston, për realizimin e të drejtave të shkelura. 2. Punëdhënësi është i obliguar për të vendosur sipas kërkesës së të punësuarit, në afatin brenda pesëmbëdhjetë (15) ditëve nga data e pranimin të kërkesës. **Neni 79 paragrafi 1:** Çdo i punësuar i cili nuk është i kënaqur me vendimin me të cilin mendon se i janë shkelur të drejtat e tij, ose nuk merr përgjigje brenda afatit nga neni 78 paragrafi 2. të këtij ligji, në afatin vijues prej tridhjetë (30) ditësh, mund të inicioj kontest pune në Gjykatën Kompetente...”*

Marr parasysh konstatimin si me lartë se Këshilli nuk ka juridiksion për të vendosur lidhur me ankesën A.nr.401/2026, dhe meqenëse nga shkresat e lëndës konstatohet fakti se ankuesit nuk kanë parashtruar ankesë të brendshme pranë organit të punësimit, atëherë, në kuptim të nenit 75 të Ligjit Nr.05/L-031 për Procedurën e Përgjithshme Administrative, lënda delegohet te Komisioni i Ankesave i Komunës së Klinës.

Bazuar si më sipër, e në mbështetje të nenit 18, paragrafin 1, nën paragrafin 1.8 të Ligjit Nr.06/L048 për Këshillin e Pavarur Mbikëqyrës për Shërbim Civil të Kosovës, Kolegji i Këshillit vendosi si në dispozitiv të këtij vendimi.

Vendimi hyn në fuqi në ditën e nënshkrimit nga Kryetari i Kolegjit.

Këshillë juridike: Kundër vendimit të Këshillit, pala e pakënaqur e mund të iniciojë konflikt administrativ në Gjykatën Themelore në Prishtinë-Departamenti për Çështje Administrative, brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk ndalon ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
Lënda, A.nr.401/2026, datë 17/04/2026

Avdyl BEKTESHI

Procesmbajtës

Arben MEHMETI

Kryetar i Kolegjit

Vendimi i dërgohet:

- Përfaqësuesit të autorizuar të ankuesve , Avokates, A. F B;
- Organit të Punësimit: Komisionit të Ankesave dhe Udhëheqësit të Njesisë së Burimeve Njerëzore në Komunën e Klinës; dhe
- Arkivit të KPMSHCK-së.